

H. 1978

LE
TOCSIN.

*Au Roy, à la Royne Regente mere du
Roy, aux Princes du Sang, à tous
les Parlemens, Magistrats, Offi-
ciers & bons & loyaux Subiects
de la Couronne de France.*

Contre le Liure de la puissance Temporelle
du Pape, mis n'aguères en lumiere par le
Cardinal Bellarmin Iesuite.

Par la Statue de Memnon.

Auec Permission du bon Genie de la France.

*Notate verba,
Signate mysteria,
Ecce enim mysterium,
Vobis dico.*

On le vend à Paris à l'enseigne de la Qua-
drature du Cercle, en la rue du Ton-
neau des Danaïdes.

M. D C. X.

Case


F

39

.326

1610 R

THE NEWBERRY
LIBRARY



LE TOCSIN.

*Au Roy, à la Royne Regente mere du
Roy, aux Princes du Sang, à tous les
Parlemens, Magistrats, Officiers,
& bons & loyaux Subiects de la
Couronne de France.*

Contre le Liure de la puissance Temporelle du Pape,
mis n'agueres en lumiere par le Cardinal
Bellarmin Iesuite.

FRANCE il est temps que le Tocsin
batte fort & sans cesse en tous les
cœurs de tes enfans, pour esueiller
& donner l'allarme à ceux qui te
doiuent deffendre: puis que le Cardinal Bel-
larmin Iesuite autant impudemment que in-
iustement, a choisi ceste nuit de la minorité
de ton Roy, pour donner l'escalade à ta Sou-
ueraineté, & pour mettre le petard aux Por-
tes de ta Maiesté tousiours inuiolee.

Il a espié le temps que ton Hercule *Henry le
Grand* estoit passé à vn autre meilleur Royau-
me que le tien, pour rendre la Royauté mal
asseuree à ton Roy son heritier, la Regence

A ij

incertaine à la Royne Regente, la succession douteuse aux Princes du Sang, l'auctorité caducque & fragile aux Parlements, le respect sans honneur aux Magistrats, la loyauté sans asseurance aux Officiers, l'obeissance sans fermeté aux subiects, & la paix sans duree aux Voisins. Car son Liure publié depuis peu à Rome sous le tiltre *De la puissance tēporelle du Pape* fait tout cela en vn coup & encor pis. Ce beau Cardinal en ce sien Liure nous fait les Pontifes comme des Cyrus, tçauoir est embrasez de desir de tout auoir & de commander par tout: Mais nostre Royne Marie leur sera cōme vne Tomiris, laquelle portee du bon droit de son Fils rompra les desseins de ces Rauageurs de l'auctorité d'autrui.

Coup iuste & necessaire, puis qu'il ne se fera par mepris de l'auctorité Apostolique: mais seulement pour chasser au loing la seruitude que ce Cardinal veut faire glisser par son Liure dans le parterre des Fleurs de lys pour encheuestrer d'icelle le col libre des Roys de France, qui plus iustement que tous les autres Roys du monde peuvent dire, *Filij Abraham sumus & nemini seruiimus unquam.*

Vn esprit Iudicieux de ce Royaume dès aussi tost qu'il veid la Royne mere declaree Regente apres le diabolique parricide commis & perpetré contre la personne sacree de *Henry le Grand*, qu'elle seroit a nostre ieune Roy comme la branche du Plane de la Ci-

cogne est à ses petits, de dessus lesquels elle challe tout venin.

C'est ores que la France attend de ladite Dame Roynne les effects de ceste prediſtion : car si iamais venin mortel s'espan-dit sur la Couronne Françoisse, c'est par le Liure de ce Cardinal, qui veult que la maieſté & la souueraineté des Fleurs de Lys soient temporellement asseruies aux Papes. Helas ! *Grande Roynne*, quelle pieté sera-ce à vous, estant Tutrice du Roy & du Royaume, de laisser impunement de vostre temps empoisonner toute la France par vn seul liure ?

Impia nam pietas posset sic vestra videri.

Que vostre Maieſté considère, s'il luy plaist, qu'il y a en France grand nombre de faux-François, ausquels la lecture de ce Liure est autant dangereuse, qu'est la baue d'un chien enragé quand elle tombe sur vne partie du corps humain desia mal habituée.

Mais celuy qui l'escriit est Cardinal. *Madame*, si ceste consideration prend pied en vostre genereuse Ame, il vous en prendra com-il en print autre-fois au Roy Demetrius que les Historiés ont surnommé Prince mal auisé ; parce que apres auoir esté long temps deuant la ville de Rhodes, & employé son sang & les moyens pour s'en rendre maistre, il perdit l'honneur & le fruit de sa victoire pour le respect d'une nue peinture de Protogene qu'il desiroit conseruer,

n'ayant voulu forcer l'endroit de la ville où estoit ce Tableau, & par où il pouuoit aysément s'en rendre Maistre & absolu Seigneur.

De mesme vous, *Madame*, aux enfans de laquelle les Rois de France ont par l'espace de plus de douze cents ans auec tant de travaux transmis la Couronne de France en toute souueraineté, & ne releuant que du Ciel, ayans pour ce regard (quoy que d'ailleurs tres-Religieux) ramené à raison les Bonifaces & Iules outrez d'ambition, & vessies enflées du vent de vaine gloire, estes ores reduite à perdre la liberté du Roy vostre Fils, si vous vous amusez à admirer la qualité de Cardinal, qui n'est considerable que comme vne vaine peinture au faict dont il s'agit, & si vous ne mettez hardiment au feu la verge avec laquelle ce Cardinal imprudent s'efforce de baqueter la souueraineté de France. Quand il est question d'attaquer vne forte place ou vn lieu estimé imprenable, on n'y va pas sans grands & notables preparatifs: Il estoit de long temps pourpenié d'attaquer la souueraineté de la Couronne de France qui ne s'emportera qu'à bonnes enseignes, car c'est vn chat qu'on ne prendra pas sans mitaines. Or voyons comme on y a procedé.

Premierement on a detrempé doucement à Rome la Maieité de son premier Parlement (estimé de tout temps le Palladium François)

dans l'eau du pretexte de Religion, censurant son Arrest donné si sainctement & si iustement contre le Parricide Chastel, & puis ayant veu que la France estoit à ce coup deuenue insensible & comme lethargique, pource qu'elle auoit auallé ceste douce & succree viande de pieté & respect enuers le saint Siege: (Comme le sacré d'Auphin Roy des poissons, ayant mangé le friand poisson nommé Pompile, deuient tellement enyuré de sa douceur que tous ses sens se refroidissent & passent en lethargie, si bien que eschoüé sur le sable du riuage, il meurt & est en fin deuoré par les oyseaux de proye,) on delibere de passer outre, & continuant de l'appaster du sucre de mesme deuotion, on se resout de faire mourir tout à fait ceste independante Monarchie, pour la rendre la proye & la curee de tous ceux que les Papes en voudront gorger.

Mais comme au pauvre Dauphin, parmy ce sien assoupissement restent tousiours les yeux ouuerts, pour toute faculté naturelle, pour luy faire voir sa misere: au moins, France Lethargique, retiens la veuë, pour voir auant que tu meures, la misere en laquelle ce liure du Cardinal te veut plonger.

Cardinal nom esclattant, mais à qui? aux Oyfillons, tout ainsi comme la pipee des Oyseleurs donne dans les yeux des Chardonne-

rets & des Linottes, à cause des brizeures & morceaux de miroirs qu'elle leur represente: mais iamais n'esblouit la veüe des Lyons genereux, qui ne s'espouuantent pas à l'ombre remuante d'un leger drappeau, ny au sentiment d'un vain fantôme.

Et qui ne te reputeroit foible, *Generouse France*, Lyonne de toutes les Couronnes, (comme le Lyon est Roy de tous les animaux) si la Remore d'un bonnet rouge auoit le pouuoir d'arrester le cours de ton independence? On dit que le Lyon à sa voix assemble tous les animaux, & toy Lyonne Françoisse, assembles, semonds & inuites tous les Potentats de la Chrestienté, pour voir la tromperie de ce second Meneclides qui insensiblement veut ietter la moleste dans l'esprit des Princes, pour les rendre subiects à un Prestre: digne certes d'estre reueré, tandis qu'il se maintiendra grand Prestre en l'univers, & Roy & Seigneur en ses seules terres, sans estendre son soulier en Idumee, & vouloir que ceux qui luy sont quant à la temporalité cōme estrangers, luy soient neantmoins pour ce regard subiects & hommageables. *In Idumeam extendam calciamentum meum, mihi alienigenæ subditi sunt.*

On lit que les Troseniens veirent iadis croistre dans la massue guerriere d'Hercules, l'Oliuier marque de repos & de seureté: & ie te dis France, que de ta resistance comme d'une

d'une massue naistra ta paix & ta conseruation : & iagoit quil te semble vn peu estrange de faire brusler publicquement par la main du bourreau le Liure d'un Cardinal : Je t'advertis neantmoins que ce tien iuste courroux te fera comme le suc des herbes les plus salutaires, comme le goust des plus efficaces Antidots, qui est aigret au palais & fascheux à la bouche, mais agit puissamment en la nature, & soulage en vn tout le corps.

Cæsar, ce renommé Cæsar, n'eust iamais conserué sa dignité, s'il eust considéré ce que c'estoit de passer le Rubicon estant armé.

Et iamais tu ne maintiendras ta Souueraineté si tu peses le passage du profond Amelite fleuve de negligence, sur le bord duquel il ya si long temps que tu gis à demyendormie & comme estendue à la renuerse, pour recevoir l'ordure du premier qui voudra souiller ton incomparable beauté.

Que si les Naramones voyans que le vent de midy auoit seché toutes leurs cisternes, se resolurent de chercher à main armee son origine pour l'attaquer & se vanger de luy; que doibs tu faire contre le vent pestifere du liure de ce Cardinal, qui tasche à mettre à sec la perpetuelle source de la souueraineté de ta Couronne?

Steneleides Ephore de Lacedemone conseilloit aux Spartiates, de porter les armes & les playes aux portes de ceux qui leur vou-

loient rauir leur liberté. Je ne suis pas si mau-
 uais du premier coup, & nonobstant s'il en
 falloit venir là, ie ne serois pas des derniers
 pour vn si bon subiect, mais ie me contente
 de t'aduertir avec Publius le Syrien, que
 l'iniure premierement receuë & non repa-
 ree a appellé sur toy ceste seconde, & que
 ceste seconde t'en emmenera bien tost vne
 troisieme, si tu la dissimules sous couleur
 d'vne religion sans religiō: Car c'est estre reli-
 gieux sans l'estre que de se laisser mener par le
 nez à la superstitiō. Bref ie te dis que le Liure
 de ce Cardinal t'est comme le cheual d'Epeus
 fut aux Troyens, c'est à dire en bon françois
 qu'il sera ta ruine: car il cache dans ses en-
 trailles mille pointes aiguïsees pour renuer-
 ser la Maïesté de tes Roys, & de suite pour
 saper ta tranquillité. I'ay leu que Pythagore
 adoroit les Autels du Temple d'Apollon en
 Delos, à cause que iamais ils ne furent en rui-
 ne: & croy que de mesme les nations reue-
 rent la France à cause qu'elle ne fut iamais
 oppressee de seruitude:

Mais hélas! ceste pauvre France ne veoit
 pas à ceste heure que comme anciennement
 aux sacrifices les hosties plus paisibles estoïēt
 celles qui estoient plustost egorgées, que de
 mesme à présent son excessiue pieté enuers
 le saint Siege, va estre la plus proche cause
 de sa ruine.

Il faudroit s'adresser au Roy Catholi-

que pour faire ces coups là en ses Estats, il nous a monsté comme il faut viure : Car quand il fut question de ce que Baronius aussi Cardinal, escriuit de la Monarchie de Sicile, ce Roy qui est pour la Sicile feudataire des Papes, mit si bon ordre à ses affaires, que il n'y a si hardy qui ose publier ce qu'a escrit ledit Baronius sur ce subiect en tous les pays de son obeissance, & ses Officiers s'y portèrent si brauement, que le Pape ny le Cardinal n'en ont iamais eu autre chose, & leur a fallu passer par là, ou par la tenestre ; & ce dás l'Italie & en des Royaumes qui payent tous les ans cens à l'Eglise Romaine. Et puis nous craindrons en France ? Nous auons peur de nostre ombre. Que si on me dit que le Roy Catholique est aussi bien offensé en ce Liure de Bellarmin que le Roy de France : Je respondray en vn mot, que les qualitez des Estats de ces deux Roys sont en beaucoup de choses differentes, & que Rome n'a pas dit le mot à l'oreille à la France, comme à l'Espagne. Les Sages m'entendent : *Et ecce mysterium quod vobis dico.*

Mais que diront à present les Aduersaires de la Religion Romaine voyans que ce sainct Siege autrefois Arbre de vie, est deuenu Taxe & Oleandre, l'ombre venimeuse desquels fait mourir ceux qui se pensent mettre en repos dessoubs la fraischeur de ses branches ?

Trompeuse verdure de Religion qui comme celle de la mer du Nord couurez par les passages verdoyans des Sainctes Escritures gehennées, les escueils & lieux où toutes les seigneuries du monde se perdent & font naufrage.

Non, non France, il n'est plus temps de dissimuler, car comme Pindare rompit la paix accordée entre les Grecs & les Troyens par vn seul traict eslançé contre Menelaus; de mesme ce Cardinal par le traict qu'il a lasché contre la liberté Françoisse, laquelle il n'a point exceptée de la seruitude des Papes, nous rend toute l'acointance du Sainct Siege pleine de crainte & de soupçon.

J'ay autrefois ouy raconter à Monsieur l'Abbé du Boys Oliuier (personnage assez cogneu pour les bons seruices qu'il rend tous les iours à l'Eglise Romaine & au Roy) que le sainct Pere qui Siege auourd'huy estoit tres-affectionné à la France, & que le Cardinal Bellarmin estoit sainct homme & de vie tres-innocente : mais maintenant ie commence à doubter de la foy de ce Prelat, car le liure mis en lumiere par le susdict Cardinal, avec la permission du sainct Pere, fait preuue du contraire. Que si sa Saincteté ayme la France, pourquoy permet-elle que ce liure y mette le feu? & si le Cardinal est S. pourquoy ne rend-il pas à la Frâce ce qu'il luy doit, en la separant des autres Royaumes,

qui sont feudataires ou tributaires des Papes pour la plus grande partie.

Je veux encores me tenir à la relation de cet Abbé (Car on le recognoist pour personnage sincere & reale qui ne mettroit pas pour mourir vne chose en auant pour vne autre) & croire plustost que la faute vienne de la negligence des Ministres du Roy à Rome, & nommément du Sieur de Marquemont Auditeur de Rote, lequel tire grosses pensions du Roy, neantmoins n'a pas eu l'adresse de descouurir l'impression de ce Liure, de laquelle donnant aduis à Monsieur de Breues Ambassadeur, il est à croire qu'il en eust fait des remonstrances à nostre Sainct Pere, & qu'à ses remonstrances le Pape (si il ayme la France) en eust fait cesser l'imprelle; & le Cardinal (si il est tres-innocent) en eust luy-mesme abhorré la publication : l'un & l'autre estans aduisez du trouble que ce Liure, non necessaire, produira par toute la Chrestienté.

Et quand à nous eu esgard à la minorité du Roy, durant laquelle on le publie, nous ne scaurions dire autre chose sinon que,

Scorpins insidias illa sub caute tetendit.

Ceux qui pensent parmi nous plus voir que les autres, se doubtent que la publication de ce Liure soit vn tourdion inuenté par la Cabale Iesuitique, pour replonger la France aux miseres desquelles le feu Roy l'auoit re-

tirée : & estiment que ces gens soient comme les Grenouilles , qui ne sont iamais à leur souhait qu'estans dans le boubier. Mais si cela estoit, ces Iesuites seroient semblables aux arbres de la forest Litanne , qui inuitent les passans à se venir reposer sous leur feuillée ombrageuse , & puis quand ils y sont, cheent sur eux & les accablent.

Car vous ne les oyez parler que de Paix, que de l'Estat , que de la Dignité de France, qui fait qu'on s'adonne à eux , & ce pendant s'ils nous vendoiert nous serions bien trompez : mais mon reconfort est qu'il y a bien de la distance, entre le vendre & le liurer.

Si cela estoit, di-ie, il vaudroit mieux, pour euitier leurs surprinses, que fussions en continuelles prinſes avec eux : car il nous aduendroit comme aux mariniers du Lac de Loumont en la Region d'Escouie au Royaume d'Escosse, lesquels pendant que ce lac est esmeule passent sans danger , & iceluy estant appaisé y font tous naufrages. Helas ! qui a plus de moien de nous nuire que les Iesuites qui confessent le Roy, importunent sans cesse la Royne, viuent comme compagnons avec Monsieur le Chancelier, & Monsieur de Villeroy, desquels ils peuuent tirer beaucoup de choses par leur dexterité pour seruir d'aduis & de moiés pour nous ruiner, à ceux qui les gagent pour ce faire?

Ie sçay bien que leurs voix & leurs escrits

sont plus doux que les chants des Serenes , & que plusieurs beaux esprits aiguisez du fil de Releon , se iettent en la mer de leur acointance , pour en ouyr de plus pres l'harmonie : mais ie recognois aussi que comme le vent qui suruint ietta Butes hors de ce danger , & le sauua en Lilibee : que de mesme le vent qui court à ceste heure contre eux en France , a tiré beaucoup de beaux esprits de la mer de leurs engeoleries , les menant à port de salut. Car se mettant de plus pres à considerer pourquoy on leur en veut tant , & à regarder leurs mœurs , non en la seule surface , mais iusques à la moëlle , & leur doctrine semblablement , ils disent qu'ils y ont trouué la mort pour la vie , le mal pour le bien , la perte de l'Eglise pour son sauue-ment , & la ruine de l'Estat au lieu de sa conseruation.

Quant à moy , s'ils sont tels , il m'est aduis qu'il n'y eut iamais charme plus fort & puissant que celuy duquel ils vsent : Car quand ie voy vn Sillery & vn Villeroy , esprits tous rayonnants en clairtez , & tout entournez de voyantes lumieres , fideles gardiens de la liberté de France leur lunon , Sillery & Villeroy qui comme deux Argus ont plustost leurs testes dans leurs yeux que leurs yeux dans leurs testes , estre tellement enforcelez des deceuantes chansons de ces larrons Mercures , qu'ils ne voyent pas qu'en fermant

les yeux à leurs surprinses , ils cloent les iours à leur honneur , & font clorre la lumiere de la splendeur & de la dignité de la France leur chère mere & douce patrie , qui les a si honnorablement partagez de ses premieres dignitez , à laquelle on rait cependant sa vache *IO* , son independence & souueraineté , de laquelle ce grand Iupin seant à Rome se monstre dans le Liure de Bellarmin si esperduement amoureux : Le suis tout hors de moy , & crois tout ce que l'Antiquité a raconté de Circé la magicienne , & encore dauantage.

Ce Iupiter Capitolin n'auoit iamais osé attaquer nostre Hercule Gaulois par deuant , & qu'il le veoit tourné , il enuoye ce cancre sophistique Bellarmin , sangsue des Princes , le blesser par le talon. Mais courage la blesseure n'en est pas encore mortelle, Iolais cest inflexible Parlement de Paris l'en guarira , & fera que cest Ixion qui pense embrasser la Iunon Françoisse n'embrassera qu'une nuce de laquelle sortiront les Centaures qui iront bondissans par toutes les prouinces qui les voudront receuoir , mais ne seront pas pour cela entretenus en France , qui ne fut iamais l'estable d'Augée.

Et comme Theron Roy d'Espagne heurtant le Temple d'Hercule fut miraculeusement conlommé avec toute son armee nationale

uale, par vn feu sagetté du Ciel : de mesme celiure voulant heurter la France, sera Iudiciairement reduit en poudre, avec toutes ses sophistiques raisons. Cela estant fatal à la France, que comme iamais personne vicieuse n'entra dans le temple de Vulcan au mont Ethna; qu'elle ne fust par les gardiens de ce temple destruicte & mise en pieces, que de mesme esprit mal affecté à la Fleur-de Lis ne publia oncques ses impostures dedans son sacraire, qu'elles ne fussent par la vigilance de ses Parlements, condamnées à estre lacerees & bruslees. Que si pour quelque briefue espace de temps, les Troubles ont ouuert la porte de la France à quelques escrits indiscrets & pernicioeux, comme quelquefois les Estrangers venoient par fortune ietter l'Ancre au port des Isles Diomedees, esquelles la demeure n'estoit permise qu'aux seuls Grecs, d'autant qu'il y auoit certains oyseaux que Diomedes y apporta, qui ne pouuoient souffrir qu'autres y demeurassent en paix que ceux qui estoient du pays de celuy qui les y auoit apportez: Ces tutelaires oyseaux s'eslançant de grand roideur sur les Estrangers leur becquetans & deschirants la face, leur mordants les bras & la poitrine, & ne quittants iamais la prinse que les attaquez ne fussent morts: de mesme en ce Royaume il y a des Parlements & des Magistrats tutelaires que les Roys y ont

establiz , qui ne permettront iamais que les ennemis de l'Estat y debitent leurs denrées : & bien que pour vn temps par importunité, ou par la protection de quelques Grands ils les dissimulent habiter parmy nous, ils ne leur en laisseront pourtant iamais la demeure paisible , ains les poursuivront à outrance iusques à ce qu'ils les en aient exterminé, ne se lassants point de les mordre & picoter sans cesse ; autant fidelles pour le moins que les chiens portiers de Minerue Iliadene en Dulie, qui par vn instinct naturel mordoient tous ceux qui venoient pour prophaner le temple, encore qu'ils y fussent introduits par son Prestre qui estoit trompé par ces detestables sous apparence de Religion.

On fait recit que les dents croches du Lezard ne peuvent lascher prinse quand vne fois elles sont accrochees, si ce n'est en ce rompart. Rompons donc ces dents crochenës de ce Lezard Bellarmin, afin qu'elles nous laissent en nostre ancienne liberté.

Cela soit propre à Rome d'y auoir vn Pâtheon où on adore toutes sortes de Dieux, la France ne peut seruir qu'à vn seul Maistre, & les causes qui touchent la temporalité de France, ne se doiuent decider au consistoire Romain : autrement ce seroit mettre en pratique la tromperie du subtil Itacque, qui voulut plaider deuant l'ost des Grecs la

cause du genereux & ingenieux Palamade, afin de mieux trahir & faire plus iustement lapider ce Prince innocent, & neantmoins voiller sa trahison d'une feinte apparence d'equité, comme les Papes couurent leur vsurpation sur ceux qui la veulent endurer, du bandeau de Religion.

Que si vne fois Iupiter enflammé de colere fit descendre aux Enfers le fleuve d'Acheron, pour auoir rafraichy de son eauë les Tyrans qui s'estoient rebellez contreluy, qui sera le iuge en France qui ne soit soigneux d'abissmer les Courriers, Libraires & Colporteurs qui font decouler tels Liures sur les cœurs rebellez à leur patrie, pour les fomenter en leur meschanceté.

Ence le pieux, menagea de cruelle mort celuy des Rutylois qui fourniroit d'armes à son ennemy Turnus: & les Corcyriens bruslerent la ville de Cillene, parce que les Heleñiens qui en estoient Seigneurs auoient aidé les Corinthiens leurs ennemis: & nos Iuges dissimuleront le secours que ces porteliures donnent aux ennemis de la France, par le liure de Bellarmin qu'ils y sement secretement.

Non France, non, ne traite plus les Iesuites (s'ils participent à ceste meschanceté) en compagnons & en amis: car desia escluez par ce bon traitement que tu leur fais, ils sont comme les esclaves des Scytes faisoient

enuers leurs maistres, s'estimans dignes de leur couche nuptiale, comme les Iesuites croyent qu'ils peuuent aysément iouër & faire ce que bon leur semble de la Souueraineté de France. Mais traite les avec le fouër, & tu verras qu'ils se donneront de garde de t'offenser; d'autant qu'ils sont comme ces bestes Teutyrides qui redoutent & fuyent ceux qui les attaquent, & attaquent ceux qui les laissent en paix.

Anciennement Vlysse le sage conçeut tres-grande horreur quand son seruiteur Eume ne luy conta les rauagements que faisoient en sa maison les amoureux de sa Penelopé. Mais à ceste heure, *Sire, Madame, Princes, Magistrats, Officiers & Peuples François*, qu'on nous fait voir à l'œil les perilleuses Maximes du Liure du Cardinal Bellarmin, & le rauagement qu'il va faire en France, si vous ne prouoyez à la suppression, soyez atteints de iuste courroux. Car il y a en iceluy des propositions qui peuuent rendre le Sacre du Roy semblable aux festes Adonniennes qui n'estoient pleines que de regrets & de pleurs.

Que les apparentes & colorees Remonstrances d'un Nonce ne trôpent pas vostre vigilance, *Royne indecicuse*, car en la matiere presente vostre Maesté se peut souuenir de la fable Egyptienne du Crocodile, qui ayant rauy sur le riuage du Nil un enfant à sa mere, luy

crioit en l'emportant : *Je te le rendray ,
 Si tu devines : Tu ne me le rendras pas* , res-
 pondit la mere toute esploree , *Rends - le
 moy donc car j'ay deviné : si ie te le rendois* ,
 replicqua la beste , *tu aurois menty , ie le
 garderay donc pour toy Et pour moy . Et*
 quoy ? quand la plainte de la censure de
 l'Arrest du Parlement paruint aux oreil-
 les du feu Roy vostre Seigneur & Espoux,
 quelle promesse luy fit le Nonce d'y ap-
 porter remede ? quelles bonnes parolles
 en donna il à Monsieur le Chancelier &
 Monsieur de Villeroy , qui seul empescha
 que le Parlement n'usast de son auctori-
 ré : & quelles de toutes ces parolles & pro-
 messes a il faict effectuer ? Il cognoist l'hu-
 meur François estre sensible en la frai-
 che douleur de sa playe , & oublieuse en
 l'enuieillissement d'icelle d'en rechercher
 la vengeance : & partant il croit qu'entre
 nous qui *ha temps ha vie* . Il en fera tout
 autant à ce coup pour destourner le brusle-
 ment du Liure du Cardinal , mais quand
 la crainte de la honte & de l'infamie sera
 passée , vous ne r'aurez pas l'honneur de
 la Liberté de la France que ce Liure vous
 raut : & ses promesses s'en iront au vent ,
 sçachant bien que comme Denys le Ty-
 ran estoit resolu de descendre de son Sie-
 ge tyrannique , plustost estant tiré & terras-
 sé par les pieds , que monté sur vn prompt

cheual, que de mesme les Papes ont determiné de ne quitter iamais la pretension qu'ils ont sur la souueraineté des Royaumes, sinon à fine force & se voyants par les bons Officiers des Rois, Potentats, & Princes reduicts à vne autorité purement Apostolique & Sacerdotale.

C'est vn Axiome, MADAME, à tout Ambassadeur, que où il va de la gloire ou de l'interest de son maistre: *Turpe est vinci, sed non cessasse decorum.*

Et pour arriuer au Cardinalat, il n'y a plus court chemin de faire par effect que les Rois se soumettent aux Papes qui s'attribuent ce verset de Dauid, *Adorabunt eum omnes Reges terra, omnes gentes seruiunt ei*, lequel neantmoins ne conuient à pas vn d'eux, ains à vn seul Iesus Christ.

Et quant au Cardinal Bellarmin, il sçait bien qu'il n'a pas tousiours enseigné ce qu'il enseigne à ceste heure, touchant la souueraineté des Papes sur les Rois: Car Sixte V. luy vouloit faire espouser la prison de l'inquisition s'il ne fust mort, pource qu'il enseignoit pour lors plus conformément à la verité, qu'il n'a fait depuis, qu'estant Cardinal & vieux, il a eu opinion de pouuoir encor à son tour iouir de ceste pretendue Monarchie vniuerselle, & d'estre Pape.

Or voudrois-ie volontiers demander à ce Cardinal voyant son Liure entre les mains

d'un bourreau prest à estre reduict en cendre, le sens de la mesme demande que fit Cyrus à Crœsus qu'il auoit prins en bataille, *Qui t'a appelé Bellarmin à faire la guerre à la Souueraineté temporelle de la France, sans motif raisonnable ? Et ie m'assure que si son Liure sçauoit parler il respondroit pour luy, l'esleuement & la seureté de la Souueraineté de France, l'agrandissement de son honneur, (mais sans y penser) & l'obscurcissement à iamais du renom de mon Auteur, avec le bannissement eternel de tous ceux qui luy adhereront hors des Estats de la Fleur de Lys souueraine: de laquelle dit le Saint Euangile que Salomon en toute sa maiesté ne fut iamais si maiestueux qu'elle est: les Lacedemoniens disoient à Antipater qui les vouloit reduire en seruitude: Traicte nous comme Citoyens dignes de Lacedemone, que nostre accord nous soit tant qu'il te plaira en dommage, mais qu'il ne nous vienne pas à honte. La France dit aussi à present au Pape: Traicte moy comme ceste France qui t'a fait temporellement ce que tu es, & sur ce qui touche le spirituel, estends ton auctorité si auant que tu pourras, mais ne fais point ton esclau ceste Couronne qui t'a fait Roy en maints endroicts d'Italie: Autrement il faut que tu croyes, si tu l'oses entreprendre que (comme disoit Auguste à ceux qui luy desconsilloient de se formaliser contre Cassius & Brutus les meurtriers de son pere adoptif Cesar) que Dieu qui a estimé nostre Roy Louys X I I I. digne du Sceptre de*

Henry le Grand, le rendra aussi digne successeur de sa valeur pour conseruer la Couronne qu'il luy a laissée franche de toute domination autre que de celle du Ciel.

Car la France est semblable aux pierres precieuses, le moindre poil qui soit au lustre de sa souueraineté fait qu'elle ne soit plus France, & que son prix en soit rauallé.

Le liure de Bellarmin pour vn temps ne sera qu'un simple pepin, mais avec les années il deuiendra vne forest fort espaisse & brancheüe, & peu à peu qui n'y remediera à temps, fera tomber les fruiets de l'arbre de vie François, & les empoisonnera: comme la Salemandre logée dans les creux de quelque arbre fructier petit à petit par sa froideur, le fait mourir & dessécher.

Quand Iupiter bailla la verge merueilleuse à Mercure son Messager, il l'accompagna de la honte pour l'apporter aux humains, incontinent apres qu'Epimethee eust formé l'homme: mais ie ne pense pas que Iesus-Christ vray Dieu ait esté moins soigneux quand il a donné l'auctorité aux Papes, de l'accompagner de la modestie & de la pudeur pour en vser discrettement enuers les humains.

Le sçay bien que comme les Egyptiens faisoient seoir leurs vierges sur des Lyons, que de mesme la prouidence diuine a mis
l'autorité

l'autorité Ecclesiastique dessus la temporelle : mais de telle façon que les Papes se doiuent souuenir que ceste autorité spirituelle, est sans lignée, ny production terrienne : comme vne vierge n'a point d'anfans charnels, ne deuans non plus oublier que les Roys sont Lions : & que comme il est aisé au lyon de faire d'un seul coup de dent cracquer les os d'une Pucelle (si elle les agace) aussi est-il facile aux Potetas de reduire les Papes bien estroitement dans leurs limites s'ils cudent irriter les Roys en ce qui est de leur temporel, en quoy gist & consiste leur force : *Non eripit* (disoit vn bon Chretien de faict & de nom Prudence,) *mortalia, qui Regna dat celestia*. Voudroient point les Papes estre en ce temps icy, semblables à la verge d'Aaron, laquelle effueillee, seiche & toute vermoulue, s'espanoüit neantmoins en vne nuit aulong & au large : de sorte que le lendemain les Enfans d'Israël apperceurent non vne branche sans feuille, non vn tronçon depourueu d'humeur & separé de son tige; mais bien vn arbre fleury, verdoyant, & tout chargé de son fruit. Les temps où nous sommes n'est plus la saison des Israélites à la lettre; mais celle des Iuifs en esprit qui garderôt bien cette verge par miracle, mais n'en emploieront plus la puissance: non plus que depuis qu'elle eust esté mise en l'Arche de l'alliance, comme dit

Sainct Paul aux Hebreux 9. elle ne fust iamais employee à aucun vsage que l'on life dans les Escritures. Il n'y a plus de Frederics au monde, outre quoy il y a long temps que Iunon Nucerrenne n'est plus, laquelle du temps de la guerre des Cimbres feit en vn tour de main renaistre & reuerdir son rameau esbranché.

Et les Papes se trompent qui cuident tous seuls faire l'harmonie de l'Eglise, en laquelle il faut qu'il y ait aussi des Roys & des Princes, tout ainsi disoit Zenon escoutât vn iour le musicien Amœbeus qui iouoit de ses Instrumens, que les entrailles des bestes, les nerfs, les ossemens, & le bois bien disposez par nombre accordants & rangez par egalles proportions font vne harmonie plaisante.

On dit que les Dragons pourrissent mangeants tousiours leurs queües, & que sans manger d'autre chair que la leur ils neraieunissent point. Or qui croiroit que les Papes de peur de pourrir, ne se vueillent tenir au Cercle de leur puissance, ains desirerent pour se renouueller, de mager celle des Princes du monde.

Helas! faut il que moy Catholique Apostolique Romain que ie suis des plus fermes, ie voye reprocher aux Papes, qu'en permettant la publication de ce liure où la France est traictee comme le moindre pays de la

terre , ils ont oublié que la France est ce saint Abicoboës, cette montaigne de support, ceste pierre de deffense, que Mahomet en son Alcoran (ne sçachant le sens de sa parolle) disoit neantmoins estre bastie de la main du Tout-puissant , pour la garde asseuree & tousiours inexpugnable de sa Hierusalem qui est l'Eglise. Ouy , ouy, comme disoit Annibal à Antiochus, mais à autre propos parlant des forces de Syrie enuers les Romains. Il n'y a que trop de doctrine en France pour resister au Cardinal Bellarmin, quoy que copieux & abondant en allegations, & nous auons assez dequoy le plumer, & rien du tout dequoy le craindre.

Cur spoliæ erit, non cur metuaris ab hoste.

He! sage Villeroy, souz l'abry duquel se cachent tous ceux qui du costé de Rome veulent naurer la Mere, ne vois-tu pas que la lumiere confuse de ce Bellarmin, dans la nuee de la varieté Françoisse presage nostre tempeste, & que le feu de son Helene tombant sur la poupe de nos vaisseaux, est le prognostique de l'esmeute de nos eaües: mais ie preuoy qu'à la fin ces eaües esmeües emporteront l'Arche de cette desreglee puissance Romaine si loing, qu'elles la confineront sur le sommet des montaignes d'Armenie, douë elle ne pourra plus offenser les Roys de la terre.

Celuy qui sonne ce Tocfin, sage Ville-roy, est homme qui t'admire de long temps, & qui sçait force choses de tes affaires, pleurant tous les iours la diminution de l'honneur de nostre commune patrie, à la fermeté de laquelle ta trop grande inclination vers Rome donne de terribles secousses.

Mais que debuons nous craindre ? l'Eglise est riche en France : il est à present question de la dignité de la Couronne de France que l'on veut faire perdre. Et qui nous peut empescher avec Themistocle, de ne faire distinction ny de biens, ny de lieux, ny de personnes pour la maintenir contre les temeraires assertions de Bellarmin, qui nous la veulent raurir ? Et qui nous peut equitalement reprendre si avec les Syracusains nous vsons sainctemēt des armes consacrees au temple de Iupiter Olympien, puis qu'il s'agist de la deffense de nostre liberté.

Que si, comme disoit Publius Curulius, on abbatoit legitimement les arbres plus deuotement consacrez à Apollon en l'Isle de Coëe pour bastir des Nauires de guerre: ne doubtez point, Sainct Pere, que l'Eglise Françoisse n'employe ses plumes & ses thresors pour se ressentir du tort que Bellarmin fait à la Couronne de France ? Et si les Atheniens se sauuerent avec les pierres precieu-

ses du monument de leurs morts, nous lapiderons ce Bellarmin avec les pierres du Tombeau d'*Henry le Grand*, durant la vie duquel s'il eust publié ce qu'il a escrit, ce Prince invincible le fust allé querir à Rome, pour le venir immoler & sacrifier sur l'Autel de la souveraineté Françoisse, & expiation de son irremissible offense.

Ha! Bellarmin, la guerre donc est declarée entre toy & la France; mais qu'il te souviene que nous ferons avec toy comme firent les Argiens avec les Spartiates. Car ou tu te desdiras vivant, ou apres ta mort, ou autrement tant que France sera France, non telle que tu la veux estre, mais telle que Dieu l'a establie, ton nom sera parmy les François aussi horrible & detestable, que celuy d'Erostate en Ephese, qui s'efforça de desmolir en vn coup ce que toute la riche Asie avoit basti en deux cens vingt annees.

Que si tu desires que tes autres liures utiles à la verité, & ton nom auparavant honorable vivent parmy nous, nous te dirons ce que disoient les Romains à Pyrrhus qui leur faisoit parler d'accord : *Quitte la liberté de la France que tu as entreprinse, & puis nous parle de paix* : Car autrement jamais ny toy, ny les tiens n'aurez repos en France, puis que tu as attendu le temps de nostre douleur pour nous faire esclaves, ainsi que firent ces vaisseaux d'iniquité, de

guerre & de tourment detestez du bon Iacob leur Pere, Simeon & Leui, qui frappèrent ceux de Sichem à destruction & en ruine, au plus grief de leur playe.

Maudite Tarentule ! çà la guerre est declaree, nous ne te traicterons plus en Cardinal, puis que tu ne nous traictes pas en Francs premiers nays de l'Eglise, pense tu nous endormir par ton Liure pour rendre lethargiques nos plus viues parties ? Mais tu es Iesuïte, tu ne pouuois faire autrement: *Simia semper Simia, etiam si purpura vestiatur*. Ha! felons Iesuïtes, qui estes comme la Nubienne Marmarique qui croist auprès du corps humain pour le destruire, Sarcophanges de la Troade qui voulez demeurer seuls & consommez tous les autres corps qui sont auprès de vous, Pirastes combustibles qui aux rays de vos liures iettez mille incendies & feux dans les Royaumes, enuieux Demons Telchines ou Alastores, qui pour deceuoir le simple peuple François, vous couurez de l'espaïsse nuée de Religion, & puisez l'eau du puant Styges la versant sur nos testes pour y faire croistre mille maux, & pour nous faire oublier les salutaires remedes que le *Grand Henry* a apporté à nos miseres. Mais vostre eau est comme l'eau de la fontaine de Telos, qui est si trouble qu'elle ne se mesle iamais avec le vin : non plus que

vostre infernalle doctrine ne se pourra
iamais accorder avec la loyauté des
François .

Car quoy que vous sembliez verdoyans
en vostre douceur & en vos escrits , Dieu
garde nostre souueraine Monarchie de se
veoir enuelee en vos enseignements ,
ny en vostre apparence exterieure , ainsi
que iamais , dit vn Historien , on ne voit
les riches murs de Babylone ceste septies-
me merueille du monde embraslez du
lierre rompant : car comme vn maçon
expert ne doit pour rien que ce soit , en-
richir ses edifices de ceste ruineuse verdu-
re , d'autant que ce seroit le lier avec ce
qui les peut abattre : aussi vn Prinçe poli-
tique ne doit nullement mettre vne demeure
de Iesuites en son Estat, quelque couleur
de Religion, de fruiçt spirituel , ou de salut
des ames qu'on luy propose, parce que c'est
marier son Estat avec la ruine & perte mani-
feste d'iceluy , d'autant qu'ils embrassent
trop & se meslent de trop d'affaires.

Ne sçauons nous pas par experience que
les plus fines perles d'Orient sont tournees
en terre par le seul & long attouchement du
plomb grossier : que de mesme les ames les
plus resoluës & les plus nettes deuiennent
ou muettes ou desloyales & perfides par la
longue hantise des Iesuites : qui ont pour
traditiue & regle de leur conseruation (ainsi

que Philippe de Macedoine voulant faire la paix avec les Grecs demandoit leurs Orateurs, pour les esloigner d'eux) de faire incontinent qu'ils approchent d'un Grand, ou de paroles, ou par artifices, que ses plus fideles & loyaux seruiteurs soient esloignez de luy, pour puis apres en pouuoir iouyr à leur souhait sans danger d'estre descouverts.

Pour preuue de cecy, combien de braues hommes le Pere Cotton a il estrangez de la Cour pour y pouuoir regner tout seul. Grâd Cardinal du Perron lumiere des lettres parlez & dites franchement, combien ce tiercelet vous a voulu faire de supercheries aupres du Roy defunct? Renommé Portugais dites librement combien de coups de coude cest impudent a donné à vostre réputation pour vous esloigner du Roy qui ne vous auancoit pas à cause de l'importunité de ceste harpie, qui vouloit tout pour ses adherants? Et vous, ô bel esprit, langue doree, l'ornement de nostre siecle, Fenouillet, combien auez vous esté heurté de fois par cest Ismaël qui ne pouuoit souffrir que vostre pure eloquence Françoisse obscurcist aupres du Roy son Stille comœdien, lequel neantmoins vous estant Euesque, & digne Euesque ne regardez plus que comme un simple Prestre? Et roy Coëffeteau grâd couteau pendant de ce veneur de Benefices, Prieurez & aduanges de Court, la pureté de ta plume luy a-elle pas

pas esté suspecte, iusques à te reduire à viure du prix de sang qui est estably pour achep-
 ter vn champ à enseuelir les Pelerins qui ar-
 riuent à l'Eglise ? Et quand à toy Valladier a-
 uec ta façon d'escrire desultoire, tu as espou-
 uanté ce Courtisan qui t'a reduit à ton der-
 nier mets ? Quant aux Euesques de Frâce il a
 tousiours esté leur fleau, ils sçauent les plain-
 tes qu'ils en ont faictes, iusques à conclurre
 en leur Assemblée de le suspendre *à diuinis*.
 Il n'y a eu que l'Abbé du Boys qui ait euité
 ses efforts & l'aye fait venir à raison, secouru
 de l'assistance iudicieuse du Nonce Aposto-
 lique, qui voyoit bien que cet esprit malle &
 vigoureux n'estoit pas pour adorer ce Cotó
 belzebuth dieu desmoufches de la Cour, qui
 a tousiours ses autels salis du sang des bœufs
 & taureaux de l'Eglise, c'est à dire de la rui-
 ne de ses plus habiles & excellents Predica-
 teurs. Il n'y a pas long temps que pour im-
 primer dans l'esprit de nostre ienue Roy
 qu'il ne se serue que des Iesuites, & rebute
 les autres, ce Charlatan faisoit vn conte
 que le Roy de Pologne (d'ailleurs Roy ma-
 gnanime & heroïque) auoit deffait & tué
 de sa propre main le Grand Duc de Mosco-
 uie, à cause, disoit ce conteur, qu'il auoit
 avec luy quatre Iesuites qui ne l'abandon-
 noient, iamais, comme si l'ombre de ces qua-
 tre Iesuites luy tenoit lieu de la presence de
 ces quatre fils Aymond, qui rendirent au-

trefois Charlemagne si redoutable. Et non-
obstant ce conte, on a aduis que ce Roy le-
quel ce menteur faisoit victorieux par le
moyen de ces Iesuites, a esté occis & vaincu.

Bref comme on lit que Iupiter avec vne
seule petite chaisne attiroit aisement à soy
tous les dieux, & ne pouuoit estre attiré de
personne: ainsi les Iesuites escriuent *en leur*
trouble lexique de Gretzerus, baril de vin, & re-
traict sale & puant de mensonge & de mesdisance,
que le Pere Coton est le maistre du Roy, que
sa Maiesté n'entend point d'autre Messie que
la sienne, qu'il gouuerne la Roynie, & de
tout mouffle, car il n'en est rien. Autrement
ce grand Cardinal du Perron qui est maistre
spirituel du Roy estant grand Aumosnier:
& ce prudent & graue Euesque de Bayonne
premier Aumosnier, & les autres Aumos-
niers de sa Maiesté, parmy lesquels il y a des
personnages qui presteront tousiours le co-
let à Pere Coton & le rendront leur disciple
toute sa vie, feroient moult raualez, & les
Chapelains de sa Maiesté n'auroient gueres
d'affaires: mais pour tout cela ie ne voy pas
que le Roy ny la Roynie gouernent les Ie-
suites, & que par aucune sorte de bienfaits
ils les ayent peu attirer à les aimer, ny à vi-
ure en bons François, & se contenir en re-
pos sans rien innouer parmy nous. Plustost
voye-ie qu'eux seuls pensent attirer toute
la France à eux: & croient d'y pouuoir em-

porter tout à coup & de haute lutte durant la minorité du Roy, ce à quoy ils n'ont osé songer durant la vie d'*Henry le Grand*. Car à peine ce Grand Roy eust il les yeux clos (& Dieu sçait si par leur moyen, à cause qu'il poursuiuoit à Rome la reparation del'injure faite à sa Maiesté en la censure del'Arrest de son Parlement donné contr'eux: & auoit menacé le Pere Coton que s'il ne changeoit de maximes il le perdrait) qu'ils bastirent vne Citadelle aux fauxbourgs Sainct Germain, sans que Roy ny Royne en ayent encore peu sçauoir qui fait les fraiz de ce bastiment, pour lequel tel, peut estre, contribue duquel on ne se doute pas: & de fine & viuue force taschent à violenter la liberté du Parlement de Paris pour estre receus à ouurir leur College, en despit & malgré tout le corps del'Vniuersité, comme s'ils cuidoient que ce soit assez pour tout vaincre de proposer qu'ils sont Iesuïtes; ainsi que le temple de Trophonius basti en Mantinee, n'auoit besoin d'autre fermeture que celle d'un petit filer d'airain.

Desia ils partagent les principaux Offices du Parlement & de la Police à leurs Confidens, estimans par ce moyen durant la minorité du Roy se tellement affermir dans l'Estat, qu'il leur soit loisible par leurs intelligences de le tourner la part où bon leur semblera.

Mais ie leur veux donner vn aduis qui peut estre leur seruira, s'ils sont sages, & le voicy. Vindexint Duc de Saxe, ennemy iuré de la France du temps de Charlemagne, voyant que ce Roy victorieux estoit passé en Espagne pour y faire la guerre, s'adressa à vn certain Prince Danois, le sollicitant de seruer sur la France: d'autant, disoit-il, que son Roy n'y est pas, & qu'à present elle est delaissee deserte & comme en butin: *Non*, luy dit le Danois mieux instruit de la portee de la France, *Non, ostez ces simples opinions, ne vous y abusez pas, ce Royaume n'est iamais vuide de ses gardes, c'est vne proye, mais c'est vne proye hameçonnée qui accroche & ruine ses pre-neurs*. A cas pareil il est vray que nostre Roy est mineur, ie le leur aduoüe, mais aussi est-il vray qu'il y a en France des Magistrats qui ont bonne veuë, & sont merueilleusement resoluë & vigilans au seruice de sa Maieité: Et entre ces Magistrats vn Lieutenant Ciuil qui ne scauroit rien dissimuler qui preiudicie à la France, & c'est pourquoy les Iesuites ne sont pas encore où ils pensent. Ie cognois tel Magistrat qui se reposoit iadis sur la vigilance du feu Roy sans se remuer de beaucoup de besognes qui se passoient par Paris, qui ores veille iour & nuict pour garder de surprinse l'aage innocent de nostre Roy Louys XIII. que Dieu garde & conserue: & me persuade considerant com-

me ç'a esté vn Iay qui par ces cris a descouvert l'Escallade & Assault que Bellarmin donnoit à la France, qu'il peut estre vray aussi qu'un Oyson par sa voix ait autresfois sauué le Capitole Romain de la surprinse des Gaulois : & crois que les Iesuites avec tous leurs filets n'attraperont iamais ce Iay, auquel la France doit decerner vne memoire annuelle: (comme on se souuient encore à present à Rome des Oysons Garde-Capitales) pource que par son cry fait à propos il a esueillé la France sommeillante & preste en son sommeil de perdre la vie de sa liberté par le Liure meschant de ce Cardinal.

Ha Messieurs les Iesuites! quel presage est-ce pour vous que les Oyseaux vous becquettent & guerroient? Lisez en Genese xl. quel fut le songe du grand Pannierier d'Egypte, & son interpretation, & adioutez y cet autre passage del'Escripture, *Nemaudira point le Roy en cachette, car les Oyseaux du Ciel luy en diront des nouuelles* : & appliquez tout cela ensemble & craignez la descouuerte & le supplice.

Vous pensez peut estre que comme les dragons ne peuuent deuenir tels, qu'ils n'ayent aualé vn serpent : qu'aussi vous ne vous pouuez rendre les plus feroces & redoutables du monde, que vous n'ayez mangé & dissipé la France. Mais ie vous aduise que la publication de ce liure du

Cardinal Bellarmin a esueillé nostre Le-
 thargie, & nous a faict recognoistre pour-
 quoy le Nonce vous porte si hautement, &
 auoit si grand peur ces mois passez que les
 Predicateurs n'esmeussent le peuple de Pa-
 ris à vous ietter hors de la ville : Car tout
 ainsi que vn Arrest de Parlement est de peu
 d'efficace sans Sergens ou Huissiers qui
 l'executent: aussi estoit le liure de Bellarmin
 de peu d'effect si vous n'estiez en France
 pour en faire l'exécution sous l'ouuerture
 de conscience & de religion. Le masque
 est leué, nous sommes aduisez & aduertis,
 à nostre dam si on nous pipe. Non, non
 ne pensez pas François, quand il fut ques-
 tion de reprimer à Naples les vendeurs du
 Liure du feu Cardinal Baronius qu'il auoit
 escrit contre la Monarchie Sicilienne, que
 le Nonce qui estoit pour lors demeuraist les
 bras croisez & sans mot dire: Il y a cent per-
 sonnes à present à Paris qui virent lors ses
 allees, ses venues, & ouyrent ses menaces:
 Mais comme ces peuples qui habitent aux
 pieds des monts de la Lune sont sourds
 parce que le bruit des Cataractes & Esclu-
 ses du Nil qui en tombent leur ostent l'ouïe:
 ainsi les magistrats de Naples feirent la sour-
 de oreille, & ne donnerent point d'occasion
 de rïsee à la Court Rom. qui se glorifie quãd
 elle voit que les peuples se laissent espouuen-
 ter par les cris de ces Nonces: & se paist de

cette vanité de croire qu'on la redoubte. Ha, ha, Messieurs de Paris, enuoyez, enuoyez voz enfans estudier aux Iesuites pour estre nourris par eux en bons François, comme Archelaüs enuoyoit en Lacedemone les enfans de Xenophon pour leur faire apprendre la maïesté de Sparte : & vous verrez quelle doctrine on leur imprimera dedans l'Ame. Voicy la leçon venue de Rome qu'on debuoir apprendre à nostre Ieunesse françoise à l'ouuerture de leurs Escholes. Mais cette science est venue de trop bon matin, & a trouué que l'Eschole n'estoit pas encore ouuerte: C'est pourquoy il y a de la pitié en elle, à cause qu'elle estant nouuellement nee, comme elle est (car les Anciens Chrestiens ne l'ont pas eüe) elle est en danger en attendant l'ouuerture du College pour se mettre à couuert de prendre quelque Catharre au serein & de se morfondre : & puis qu'il faille la chauffer, & luy applicquer les ventouses & vitions pour la garantir de tout mal, pour l'empescher d'infester les autres.

Messieurs les Iesuites, vous auez esté assistez principalement par les femmes en toutes voz affaires, & par ceux qui en faisoient la production : car sans la faueur de telles gens vostre cas alloit tout de trauers: Mais à cette heure que vostre masque est descouuert, & qu'il conste par le liure de

Bellarmin que vous enseignez que France n'est plus France, c'est à dire Souueraine & indépendante : les femmes mesmes vous vaincront & deffairont, comme les Lacedemoniennes desirent en bataille rangee les Messeniens qui estoient venus pour surprendre leur ville. Et quand il n'y auroit que la Marquise de Vernœil & la Comtesse de Moret, & la Sainte Beuve vostre faciendaire au monde, elles ont trop experimenté la foüefue odeur que red la Fleur de Lis pour la laisser ainsi flaiſtir par vos indiscrettes & importunes halenades, afin que ie ne dise puantes, car le mot ma cuidé eschapper. Seigneur de la Varannes, & vous dames de Garenne dites moy qu'eust-il esté de vostre mestier si la France n'eust esté souueraine? vous debuez vostre bien à sa souueraineté: Car si le Pape eust voulu que vous eussiez esté bannis de la Court, & qu'on n'y eust pas voulu acquiescer : Le Roy sans la souueraineté de la France estoit depofable à la volonté du Pape, & partant inhabile à vous faire du bien. De sorte que c'est la souueraineté de la France qui vous a mis à couuert & à vostre ayse, vous la debuez dōc maintenir & deffendre.

Ie dis pl⁹ que les Marquises de Guercheuille & de Maignelet, Dames d'honneur & de respect & d'autre renommee que les premieres : sans doubte auant toutes les autres haſleront

haſſeront les chiens aux Ieſuites , auſſi toſt
 qu'on leur aura leu leur Bellarmin. Et l'Eueſ-
 que de Paris que ie veux croire vray François
 mourra de regret, que ſon attestation de
 leur innocence aye porté en croupe vn cri-
 me ſi infame comme eſt celuy que de vou-
 loir par eſcrit, raur la Souueraineté à la Frâ-
 ce, à laquelle luy & les ſiens doiuent tout
 leur bien & leur honneur. Et pour le regard
 de Monsieur le Duc d'Espéron il a tant ex-
 perimenté en la ruyne du feu Roy Henry
 III. ſon tref-cher & tref-bon Maistre quel
 malheur a trainé avec ſoy ceſte opinion qui
 faiçt le Pape Souuerain des Roys de France:
 que l'on croit qu'il ſçaura bien recognoiſtre
 que pour eſtre bon François on ne perd pas
 l'eſſéce de bon Catholique. Je viens à mon-
 ſieur le Preſident Seguier lequel outre qu'il
 a eſté Aduocat du Roy & Lieutenant Ciuil
 à Paris, & partant ſçait bien avec quelles ba-
 lances les bons Magiſtrats pezent telles dro-
 gues: Je ſçay de plus aſſeurement que depuis
 peu il a aduoué à vn homme d'honneur que
 il ſeroit vtile ſi on vouloit laiſſer viure les
 Ieſuites parmy nous qu'ils iuraſſent & ob-
 ſeruaſſent les maximes Françoises, ou qu'ils
 ſe retiraſſent. Il n'a qu'un ſcrupule qui eſt
 que les Huguenots ſe reſiouiſſent quand on
 pourſuit les Ieſuites: & neantmoins ce ſcu-
 pule ne m'eſmeut point quand ie vois que
 nous craignons de nuire à ceux qui par leurs

escrits & actions nous rauissent nostre liberté, & n'ont point de compassion de nous tandis que les considerations qui les regardent nous arrestent, de deux maux inévitables choisissons tousiours le moindre. Les Huguenots se rient de voir les Iesuites poursuivis, & les Iesuites nous veulent faire esclaves du Pape, qui haussera & baissera nos Rois quand bon luy semblera, & les chassera du Throne quand'il luy plaira. Mais laissons rire les Huguenots, & cependant deffendons nous des Iesuites: car l'un nous importe plus que l'autre: & quant à moy j'aime mieux (ne pouuant faire autrement,) que les Huguenots rient de voir que les Catholiques poursuivent les Iesuites, que si les Iesuites rioient d'auoir & l'adresse & la hardiesse de faire esclave la Couronne de France par vn seul Liure, & sans tirer arquebuse ny pistolet. Et quant à vous Messieurs du Clergé, vous auez occasion de vous refiouir de ce que, si vostre pension est mal employee au Neophite Pelletier (ainsi le nomme le pere Coron) parce que par icelle vous entretenez celuy qui tasche avec Rapsodies & ineptes deffenses à couvrir la honte des ennemis de la patrie: estant natif de Valoignes en la basse Normandie, d'où lon tient que Iudas qui trahir son bon Maistre nasquit, à tout le moins a elle fait du fruiet en la personne de ce grand Arc-boutant de la Socie-

té de Iesus le Pere Coëffeteau Jacobin: lequel cōme vn second Themistocles, voyant que tout ainsi que l'amour que ces Persiens portoient à ce grand Capitaine, & tout le bon accueil qu'ils luy faisoient n'estoit que pour se servir de luy à la ruine d'Athenes & des Grecs, dequoy s'estant apperceu il fit semblant de sacrifier à leur victoire, & s'im-mola luy mesme au salut de son pays en beu-uant le sang du Taureau. De mesme, dis-ie, ce vaillant Coëffeteau s'estant prins garde à quoy tendoient les caresses des Iesuites, & ayant recogneu qu'ils se vouloient servir de luy comme d'un chef de party contre la li-berté Françoisse, faisant prudemment sem-blant de sacrifier à la victoire Romaine par l'accointance de Monsieur le Nonce: en descourant par le moien dudit Seigneur le liure & l'autheur d'iceluy au Commissaire l'Anglois, s'est rendu à iamais signalé, & a monstre qu'il est bon François: en cela con-traire à l'eau de la fontaine Cephuse laquelle mise à l'estroit dans quelque vase, n'a si tost perdu son libre courant qu'elle ne se trans-mue en verglas, s'endurcissant peu à peu en cailloux. Car l'estroite amitié qu'il auoit de-puis la mort du Roy iuree aux Iesuites à cō-dition qu'ils le feroient faire Euesque, ne l'a point rendu insensible à la plaie de sa patrie: l'amour de laquelle l'a faict couler dehors & descourir le Liure, ce qu'il contenoit, &

les personnes qui l'auoient, desquels le Magistrat de Police l'a eu pour mettre entre les mains de Messieurs de la Cour: qui recognoistront bien tost que cest œuvre detestable est semblable à ces grandes machines qu'on souloit bastir à Rome le iour de la feste Carmenienne: lesquelles representoient de grands chars triomphans, & au dedans n'estoient pleines que de foin & de paille: matieres autant combustibles que les fueillers de ce liure qui par son tiltre se fait Geant, & en effect comme on verra par sa refutation, n'est qu'un ramas de ballieures & brindelles de ie ne sçay quels Autheurs desliez & descousus.

Or si la France veut sçauoir qui ie suis qui ay sonné ce Tocsin: ie suis la Statue de Memnon plantee non en Thebes d'Egypte, mais en Paris de France, & comme la vieille statue de Memnon au leuer d'Apollon, touchée & eschauffée de ses rays, rendoit un son merueilleux qui faisoit accourir tous les citoyens: aussi au leuer de quelque feu que ce soit qui vueille brusler la France touchée & eschauffée de ses flammes, Ie crieray Alarme, Alarme, pour esmouuoir tout le monde, & quoy qu'on me persecute & tourmente, ie ne cesseray neantmoins de sonner mon Tocsin, non plus que ceste statue ne cessa iamais de retentir, quoy qu'elle fust my-partie en pieces par Cyrus.

Voila qui ie suis : & toy quiconque fois bon François comme anciennement Pythagore par la mesure du pied d'Hercule peut bien descouvrir la grandeur de son corps : descouvre aussi par cest eschantillon la force de mon amour enuers la France : lequel sil est iamais fomenté par le Roy produira de terribles effects, sans neantmoins me departir iamais de l'obeyssance, foy & communion de la sainte Eglise Romaine : La superiorité spirituelle de laquelle ie reconnois sur toute la Chrestienté, ne croyant pas pourtant ce que lon dit à Rome, sçauoir est que tous ceux-là soient Lutheriens ou Huguenots, qui rendants à Dieu ce qui est à Dieu, ne veulent aussi rien oster aux Roys, pour donner aux Papes, ny flechir le genouïl deuant les Iesuites : *Reddite quæ sunt Cesaris Cesari, & quæ sunt Dei Deo.* Autrement il faudroit conclurre que tous les Magistrats de la Couronne d'Espagne, & la Serenissime Reublique de Venise, qui ne desmordent rien de leur Souueraineté pour complaire aux Papes, fussent todos Lutheranos. Ce que gens de bon sens n'oseroient dire.

Et Adieu sans Adieu.

*Extrait d'un Auteur qui a escrit
l'Histoire de nostre temps.*

VNE bonne partie des François estoit de la Ligue sous pretexte de Religion, iusques à ce que le Duc de Feria Ambassadeur d'Espagne osta le masque de son maistre, lors que aux pretendus Estats de Paris il demanda le Royaume de France en propriété & succession pour vne fille d'Espagne, contre ce qui est escrit en l'Evangile *Que les Lys ne fillent point.* Car ce fut lors que le President le Maistre au peril de sa vie prononça ce bel & notable Arrest l'an 1593. le xxviij. de Iuliet, par lequel sur peine de la vie est deffendu de parler de transporter la Couronne en autre main que celle des vrays heritiers d'icelle: Declarant tous traictez faicts au preiudice de la loy Salique & autres loix fondamentales de la Fleur de Lys de nulle valeur, & exhortant le Duc du Mayne d'employer son authorité de Lieute-

nant, à ce que sous pretexte de Religion la Couronne de France ne tombast en main estrangere contre les loix du Royaume.

*Application par la Statue de
Memnon.*

VNE notable partie des Catholiques adheroit aux Iesuites sous pretexte de Religion, iusques à ce que le Cardinal Bellarmin Iesuite, ostant le masque de la cause pourquoy le Pape insistoit si asprement que les Iesuites demeurassent en France, lors que pensant qu'on deust asseurément ouvrir leur College à Paris, il enuoya sous pretexte de respondre à vn certain Hercules, le formulaire de ce que lesdits Iesuites y debuoient enseigner à nostre Jeunesse, touchant la Souueraineté de la Couronne de France, qu'il assuiettit à la volonté des Papes, contre ce qui est escript des Lys, *Quæ non laborant*, ils ne sont point vilains, roturiers ny serfs. Ce fut lors que la

Statue de Memnon au peril de sa vie
sonna ce retentissant Tocfin l'an mil
six cens dix le dixseptiesme Nouem-
bre, par lequel à peine d'estre decla-
rez chelmes & traistres elle dissuade
à tous bons François de dire ny d'en-
seigner que les Papes puissent en quel-
ques façons, ny pour quelque cause
que ce soit disposer temporellement
de la Souueraineté de France, decla-
rant tous liures faiçts au preiudice de
ceste Maxime fondamentale Fran-
çoise, diaboliques & meschantes, &
exhortant les Sieurs Euesque de Pa-
ris N. N. N. de Guercheuille, de
Maignelet, la Marquise de Vernueil,
Comtesse de Moret, N. & autres,
qu'il appartiendra d'employer l'hon-
neur qu'ils ont d'estre naiz en France,
& y auoir du bien, à ce que sous pre-
texte de Religion la Souueraineté
Françoise, ne tombe en main de Pre-
stre contre les loix fondamentales de
la parole de Dieu & de ce Royaume.
Et admonestant en particulier vne
seule fois pour toutes les Sieurs N. N.
de ne plus intimider les Magistrats qui
veil-

veillent pour le salut de la Monarchie
 Françoisé, & de ne point abuser de
 l'auctorité qu'ils ont par leurs artifices
 empietee aupres de la Royne, au tres-
 grand preiudice des Princes du Sang,
 Seigneurs, loyaux Officiers & fideles
 seruiteurs de la Couronne qu'ils de-
 priment & abaissent tant qu'ils peu-
 uent pour gouuerner tous seuls, ou à
 leur mode: Autrement si apres ceste
 admonition, ils ne se gardent de mes-
 prendre, la Statue de Memnon, des-
 couurira bien des pacquets. Et ils ver-
 ront en Mardochee, quoy que pau-
 ure & vestu de toille, sauuer le Roy
 & l'Estat, descourant les menees de
 ces deux Tarés & Bagatan: Car la Frā-
 ce est desormais lasse de plus souffrir
 leurs tours de passé-passe.

G

*Extraict de l'Addition de Möstrelet
l'an mil quatre cens nonante cinq.*

COMME le Roy entra à Rome avec son armée & de tout ce qui y fut faict le dernier iour du mois de Decembre, le Roy Charles avec ses gens en armes, Princes & notables Seigneurs, & comme tenant la main forte entra en la Cité de Rome avec toute son armée en bel ordre, dequoy plusieurs furent estonnez : mais estoit adonc enuiron la nuit. Au moyen dequoy furent allumez vne grâde quantité de torches & fallots, & ainsi entra par la porte Flamine près l'Eglise de sainte Marie de Populo : & en trauersant vne partie de Rome, il alla luy & sa seigneurie loger au Palais de saint Marc, où il fit ordonner son Artillerie : & les autres chacun en leurs logis, ainsi comme lesdits Seigneurs les auoient ordonnez. Le Pape Alexandre VI. adonc aduertie de l'armée & grande puissance du Roy, s'enferma adonc-

ques au Chasteau sainct Ange, dautant aucune motion : mais le bon aduint du Roy, & de son Conseil furent enuoyez pardeuers luy les Comtes de Foix, de Bresse & de Ligny, avec le Marechal de Gyé, & l'Euesque d'Angiers, Maistre Iean de Reiy, lequel fit la harangue enuers ledit Pape, par telle maniere qu'il se contenta, & fut assureur : dont de là en auant eut pacifique accointance, & bõne amitié entre ledit Pape & le Roy, avecque tous les nobles Seigneurs. Le Roy s'occupoit tous les iours à ordonner son affaire par tout bon conseil, il visitoit deuotement les Eglises, & Saincts lieux de Rome, où luy furent monstrez en plusieurs lieux les Sainctes Reliques & merueilleux ioyaux, en quoy luy & les siens prindrent vn singulier plaisir & deuotion. Et pour brief le Roy se demonstra auoir lors pouuoir si vigoureux & manifique en la Cité de Rome, qu'il y feit dresser trois ou quatre Iustices : & mesmement fit pendre, estrangler & decapiter aucuns larrons

meurtriers & malfaiçteurs en camp de fleur : il fit semblablement battre, fustiger, voire, & efforeiller autres delinquans, pour demonstrier que comme vray fils de l'Eglise & Roy tres-Chrestien, il auoit haute Iustice, moyenne & basse dedans Rome, comme dedans sa ville de Paris, ou autre de France. Et durant ce temps vn grand pan de muraille sans violence cheut du chasteau Sainct Ange dedans les fossez, dont ledit Pape fut aucunement irrité & espouuanté & les Romains cuidoient d'autre part qu'il fut ainli faiçt par miracle. Le Roy visita la somptueuse place de Colisee, & autres merueilles de Rome le venredy 16. iour dudiçt mois de Ianuier, le Roy accompagné de toute sa Noblesse, fut ouyr la Messe à S. Pierre de Rome, & là par bonne paix & dilection, le Pape & luy deuisoient familièrement ensemble, bras sous les bras, comme compagnons. Et brief fut faiçt vne telle amitié entr'eux-deux, quel'Euesque de Sainct Malot

fut adoncques faict Cardinal, & fut le Roy avec le Pape aucuns certains iours. Le mardy ensuiuant 20. iour de Ianuier le Roy ouït Messe en vn lieu dit la chapelle de France, là où il toucha, & guerit les maladies des escrouelles : dont ceux des Italiens voyants ce mystere, ne furent oncques si esmerueillez. Et cediect iour le Pape chanta Messe solemnelle au grand autel de Saint Pierre de Rome, presēt le Roy, & toute sa Noblesse, grands Seigneurs, & gens d'Ordonnance. Et là estoient en nombre 25. Cardinaux, avec'environ trente Archeuesques, & quarante Euesques, sans les Prothonotaires, & autres Seigneurs d'Eglise. Et apres la Messe chantee, le Pape & le Roy ensemble, avec leurs gens dessusdicts, vindrent en vne place preparee à l'entree de Saint Pierre : & illec sur vn eschaffaut pour ce ordonné, fut par vn Euesque deuant tout le peuple demonstree la sainte face de Iesus-Christ trois fois : Et là tout le peuple crioit adonc à haute voix miseri-

corde. Et apres ce faiēt le Pape fut porté sur vn eschaffaut deuant la-
dictē Eglise : & là de costē luy fut assis
le Roy. Et en apres les Cardinaux
chacun selon leur ordre, & les Sci-
gneurs du sang Royal : puis le Sainēt
Pere fit dire à toute le peuple, Confi-
teor, pour donner pleniē remission
de peine & de coulpe, comme à l'an
Iubilē, il auoit sa main senestre sur l'es-
paule du Roy. Et par cettē maniere
fut illec chacun absout de peine &
de coulpe en moult grande deuotion.
Et adonc estoit le Turc au chasteau
Sainēt Ange, lequel pouuoit veoir
tout ce peuple dequoy il fut moult
esbay. Et apres ce faiēt chacun se re-
tira en son logis bien ioyeusement. Le
Roy visita les sept Eglises priuilegiees
qui sont dedans Rome & dehors. Et
le Dimanche apres suyuant, le Pape,
& le Roy, pour eux demonstrier bons
amis cheuaucherent ensemble par la
ville de Rome. Le Roy demonstra au
Pape & à ses Cardinaux le train de son
armēe qu'il auoit en Rome par belle

ordonnance : qui estoit vne merueilleusement belle chose à voir pour ceux qui l'aymoient, & vne crainte pour ses ennemis, depuis furent encores aucuns iours en la Cité de Rome. Le Mardy 27. iour Ianuier le Roy commanda de faire preparer tout son train pour soy departir de ladite ville de Rome, & alla humblement prendre congé dudit Pape Alexandre & plusieurs de ses Cardinaux, qui tous luy auoient fait vn moult bon accueil.



